



Oppene Bréif vun den Organisatiounen **A.L.P.A.** a **Vegan Society Luxembourg** un de lëtzebueger Landwirtschaftsministère

Mat dësem Schreiwes expriméieren d'Organisatiounen VSL a.s.b.l. an ALPA a.s.b.l. hiren totalen Degoût an verwerfen op d'Schäerfst dat elend Schauspill, dat sech nees dëst Joer op den Däichwisen ofgespillt huet.

All Joers ginn wierlos Déieren op enkster Fläch agefpercht a wéi am 19. Jorhonnert, wou nach anerfaarweg Mënscherassen op genee esou erbäermlechen Foiren als Attraktioun gewise goufen, dem "Public" als Errungenschaft vun eiser Massendéierhaltung presentéiert.

All eenzelt Déier, ongefrot vun sengem "Ziichter" aus rengem "wirtschaftlechem" Eegenotzen an d'Liewen gezwongen, an erbäermlecher Gefaangenschaft gehalen en vue vun sengem Schluechten an jonkem Alter, gouf dësen Weekend em de Rescht vun senger Dignitéit op dësem lamentabelen Spektakel bestuelen an zum rengen gefills- an séilenlosen Objet während 3 Deeg op enger „Foire Agricole“ degradéiert.

Nei ass och net, datt d'lëtzebueger Inspection Vétérinaire, sech rëm definitiv als Complice vun enger reng op Commerce, Benefice, Marketing an Ausbeutung orientéierter Landwirtschaft entbléisst. Trotz den ganz kloren onerdréiglechen Meteokonditiounen huet d'Inspectioun d'Ausstellen an domat weider d'Mësshandelen vun den Déieren op der Foire Agricole zougelooss. Sou sinn niewend dem Ausstellen, Déieren och bei den extremen Temperaturen zu Performancen gezwonge ginn.

Ardenner Päerd déi bei net klimagewinnnten Temperaturen ganz Schoukllassen an der gliddeger Sonn hu missen schleefen, sinn eng ethesch Zoumuddung fir all Betraffenen an pedagogesch verwerflech. Wat hunn iwwer 3000 Schoulkanner deen Dag iwwerliwwert krut? Dass Déieren just fir en Endprodukt ausgebeut ginn an tëschenuewerch eiser Spaassgesellschaft als Amusement dengen?

Kee Wonner datt avertéiert, modern an ethesch Schoulmeeschter a Léierinnen dësen mëttelalterlechen Aarmuttspektakel entretemps aus Iwwerzeegung oflehnen an d'Kanner iwwer eis tatsächlech Relatiounen tëschen Déierenelend an Massenzucht, Klimawandel an Welthonger an -armut nohalteg an didaktesch korrekt an éierlech opklären!

Sprenklerinlagen an den Zelter - an deenen tropesch Klimaverhältnissen virgeherrscht, an den Déieren net am Usaz gehollef hunn - konnten net iwwer d'irresponsabel Ëmstänn ewechtäuschen, an och net besuerkten Leit virgaulen, dass ee sech em "déi deier Béischten" (Zitat vum Organisateur) bekëmmert. Anstatt dass d'Inspection Vétérinaire als leider eenzegt responsabelt an zoustännegst Organ dës Déierequalerei ofgesot hätt, hunn se, wéi gewinnt, erëm als Deel vum System matgespillt!

Weider Beispiller an Doléancen kennen op de sozialen Netzwierker nogelies ginn wou sech eng sëllech Visiteuren iwwer d'Konditiounen opgereege hunn – souwäit d'Kommentaren net geläschet goufen!

D'Telefoner an d'Mailbréifkëschten si beim Déierenschutz mat entsaten Protester an dem Ruff nom Ofschaffen vun sou engem Mëttelalterspektakel aus Respekt virum Déier iwerflut ginn!

-Mir fuerderen dowéinst op e Neits, dass de Ressort vum Déiererschutz an d'Inspection Vétérinaire aus dem Agrarministère erausgeholl ginn an engem Ministère ënnerstellt ginn, deen a kengem Interessens- a Gewëssenskonflikt mat der Agrarlobby steet! Soulaang des politesch Perversioun als legalen a pragmatischen Widdersproch bestoe bleibt, ass keen objektiven Déiererschutz méiglech.

-Zesumme fuerdere mir, datt keng Mineure méi am Kader vum ëffentlechen Schoulunterricht des Form vun Bloussstellen an Ausbeutung vun wierlosen, fillenden Liewewiesen als natierlech Landwirtschaft bäibruecht kréien. Heizou gehéieren och genee esou lobbyistesche gesteiert, finanzéiert, manipuléierend Visite am „Vitarium“ déi de Kanner iwwe „spilleresch“ Aart a Weis e Produkt verkafe soll, ouni op d' Konsequenzen fir Gesondheet an Ëmwelt am Numm vun der Ausbeutung vun Déieren hinzeweisen!

-Mir fuerderen datt "Foiren" , genee esou wéi Zirkusser keng Déieren als Produkt, Spillsaach oder aner kommerziell Objekte ausstellen.

An de Medien huet d' Agrarlobby behaupt, si géing esou de Leit d' Landwirtschaft méi no bréngen. Mee wéi eng Landwirtschaft? Streichelzoo mat Déieren déi an aartgerechter Fräiheet normalerweis net unzepake wäeren, sinn eng pedagogesch Zwangsprägung déi Kanner an onkriteschen Erwuessenen eng „heile Welt“ virgaulen, déi et an der Landwirtschaft mat der aktueller Déierenhaltung souwisou net gëtt.

Gouf hinnen och erkläert datt et Ranner gëtt, déi , en Liewen laang am Stall zur Immobiliteit verdaamt, net op den Wisen trëppelen dierfen, well dann hiert Fleisch beim Schluechten méi zart gëtt? Wuel kaum!

-Mir fuerderen op en Neits datt d' Déiererecht an d' Constitutioun geholl gëtt, anstatt datt sech ëmmer méi nëmmen den Déiererschutz "à volonté " etabléiert .

-A schliisslech fuerdere mer den Landwirtschaftsminister op , der Inspection Vétérinaire en echten Déiererschutz ofzeverlangen, soulaang des Inspectioun nach ënner sengem Ressort ass.

Lëtzebuerg den 5. Juli 2015